

Sumario di advisi di Levante per lettere del Consolo de Damasco, date a Damasco a dì 15 Febraro 1520.

Come el signor Gazeli era uscito fuori de Damasco cum tutti li sui schiavi et molte gente de quel populo contra lo exercito turchesco; el qual, per quel che l'havea possuto intender, era de persone 25 milia, et se havea reduto circa milia 10 lontan da Damasco. Et quelli del signor Gazeli, visto lo exercito turchesco, se messeno in fuga et voltano; et turchi drieto loro, tagliorno a pezi el ditto signor Gazeli cum li sui schiavi et gran parte de le altre gente che l'havea seco; et questo fu a dì 5 de Februario a hore 21.

Come, turchi introrono in Damasco senza contrasto alcuno, sachizando tutti chi meglio poteno, et sachizò *etiam* la casa dil dito Consolo; ma venuto uno janizaro de existimatione, salvò le persone et le robe de tutti li mercadanti.

Come, acquetato el sacho, ditto Consolo era stà chiamato da Ferag bassà capitano del ditto exercito turchesco, et andato cum i mercadanti nostri a la presentia sua cum el presente solito, lui se dolse molto cum el Consolo de l'infortunio et danno occorsoli, et promise de far far eride per recuperatione de le robe, cum altre offerte assai; et che erano stà fatte le eride et provision debite, ma fin quel hora poco era stà recuperato.

Come erano stà mandà al Cayro mille janizari per conservatione de quel loco, et se diceva che Cayrbech schiavo remaneria de li al Cayro come prima; et che do mille altri janizari erano stà mandati a li confini de Sophi; et che de li in Damasco ne restaria 4 milia; et che tutto el paese staria in pace et quiete, essendo destrutti tutti li schiavi, et che tutto el resto de l'exercito era per ritornar a Constantinopoli.

Come el ditto bassà li havea dato un salvoconduto et ordenato che 'l scriva in Cypro a li mercadanti nostri fuzili de li per le revolution di guerra, che vadino securamente a contratar et star de li come nel paese nostro, perchè havea cussi comandamento dal Gran Signor; et per quanto se vedeva, erano per farli bona compagnia.

Laus Deo, 1520.

Copia de un capitulo de una lettera scritta de dì 16 Zener 1520 per missier Andrea Morosini da Aleppo, directiva a sier Francesco Zacharia.

Per non mancar del debito, sarete avisato come el Gazeli si ha fermato fino a dì 12 del mese in Aman cum intention forse de far facto d'arme; ma inteso el victorioso campo esser facto vicino, si ha levato et la sua compagnia tutta resolta, *adeo* che è rimasto solo cum cavali 700 in circa, sui homeni et schiavi. Ancor non habiamo che volta el tenirà; si dubita non faci danno a la caravana de la Mecha, qual doveva esser vicina a Damasco. Idio non el voglia, che saria gran ruina.

Del Cayro habiamo, per olachi vegnuti a la Jaza per mar, el tutto esser in gran quiete, et cussi de tempo in tempo si conferma el victorioso campo eompirà da esser fin do zorni. Saran di janizari 5 milia, et carete 60, et poi cavali da 25 milia cum li signori de li lochi, et tutti sono qui reduti. Penso fin zorni 4 si partirà el signor de Tripoli et Aman de li soi lochi. Io manderò messo a Tripoli cum lettere a voi, ch'è l'avisò aziò vi piaci vgnir quanto più presto potete. Et avanzarete ne li ori, perchè fino la moneda del Cayro sono pericolosa. Si jetano . . . ma como si avanzano, el methecal, che hora val . . . 130, sarà 1, 145 et 50, come era Elu (?) in ponto far, et poi el defendar presente dia esser de qui et solictarà. Besognerà spesa; el meglio è esser presto; sareti *etiam* sicuro de qui.

1520, a dì 30 Zener, in Famagosta.

Ventura di Ventura mercadante venetiano, ozi venuto da la Jaza cum la nave Mosta, reporta come, per li movimenti del signor Gazeli, Benesoar el signor del paese de Alidulat, fo el primo che corse cum 6 milia persone a soccorer turchi in Aleppo; et dopo lui, circa la fin di Novembre, el bassà de la Caramania, havendo facto una massa de altre 6 milia persone in Adena, tirò a la volta di Aleppo, *adeo* 47* che al signor Gazeli è stato necessario removersi da Fassedio di Aleppo, nel qual era stato 12 zorni. Re-

(1) La carta 46* è bianca.